

POLOME GALASIA TANGE DUPANYA PEPA PYAO PYASAKAMAIYAMO DOKO

Pii atupa wambao kandapenge

Wamba Jisasanya Wai Pii Epe doko Juta dupa-kisa iki tayamopa maitakao endakali waka dupa apatame siami-pyaa. Dopa piamopa yangi dupame Jutamanya mana miningimali pyoo mana setapae Goteme Mosese maiyamo dupa watao minao Kitisene angi katamanana leami-pyaa. Dopa leaminopa Polome daa lea-pyaa. Mana setapae dupame Gotenya enomba dokonya tolatae joo katapenge daa. Kataisa lao masoo miningi tenge dokome iki tolatae katenge. Kataisame iki Gotepa endakalipanya kainanya pii lao wasingi.

Esia yuu dokonya Galasia doko Lomanya potopinja mende sia-pyaa. Potopinja dokonya sosa mendapua kateaminopa endakali mendapuame ipupala dupame Gotenya mana dupa pitaka watao minataminopa Goteme endakali dupa tolataena lapengena lao Polonya pii doko pyaanya palyiami-pyaa. Polome pepa dake pyao pituu deaka sambo pii dupa sepeng daana lea-pyaa. Polome lao pituu baa aposele angi doko endakali mendeme makande piami daa. Baa Goteme yapao nyepala aposele katena lao makande pia-pyaa.

Polome Galasia tange dupanya pepa pyao pyasakamaiyamo dokonya pii lyaa dupa:

- 1:1–10 Pii wambao pepanya piamo dupa
- 1:11–2:21 Polo aposelenya kenge siamo doko
- 3:1–4:31 Wai Pii Epe dokome Gotenya kondo kaenge doko panasilyamo
- 5:1–6:10 Kitisene dupa Kataisanya pundipundi katao koonya mokao nyepae katenge
- 6:11–18 Polome pii etao lasa leamo dupa

1 ¹Namba^a aposele Polome pepa dake pyekelyo. Endakali mendeme namba aposele kata latala puu laa naya. Jisasa Kataisapa Takange Goteme Jisasa malunya sakatasiamo dokopa dolapome namba aposele kata leambi. ²Nambapi^b namba-pipa awapa katamano masoo miningi kaiminingi dupa pitakapimi pepa dake Galasia yuu dokonya Gotenya sosa kalyamino dupanya pyao peekelyamano. ³Naimanya^c Takange Gotepa Kamongo Jisasa Kataisapame nyakama kandao mona epe mende palyetala nyakamanya mona doko lyuu lasekena. ⁴Jisasa^d Kataisame naimanya Gote-kisa Takange dokome pipyali lao masiamoli pyoo baame naima koo singi yuu angenya mokao nyalanya naimanya koo ongonya yanu pyao baa tangeme kumia-pyaa. ⁵Tanga^e tangapi Takange Goteaka lao tama pipenge lamo! Kiniaka.

Wai Pii Epe waka mende nasilyamona leamo doko

⁶Kataisame^f mona epe palyoo nisiamo dokonya nyakama ipupa leamo Gote doko nyakamame yapa maita maitala Wai Pii Epe waka mende watao pelyamino dokonya namba walu lelyo! ⁷Kiningi,^g Wai Pii Epe waka mende nasilyamo. Nasilyamoaka doko, endakali mendapuame nyakamanya masingi minao kyakasakao Kataisanya Wai Pii Epe doko aloo pipuma laka lao masilyamino. ⁸Dopa^h pilyaminoaka doko, naimanya mendemeaka tamopi kaitinya enjele mendeme tamopi Wai Pii Epe wamba naimame langiamano doko lao langya naenya, waka mendepale mende langitamo kandao doko baa yuu koo ongonya pena kayata! ⁹Wambaⁱ naimame langiamano doko nambame deaka langilyo: akali mendeme nyakama Wai Pii Epe wamba siamino doko lao langya naenya, waka mendepale mende langitamo kandao doko, baa yuu koo ongonya pena kayata!

¹⁰Nambame^j dopa lelyo doko endakalimi sepala auu kaena lao lelyope, pande Goteme sepala auu kaena lao lelyope? Nambame endakali dupa andiki andiki pyoo lelyope? Daa, nambame endakali dupa andiki andiki pyoo mee lawaka katapuli kandao doko, Kataisanya kendemane joo nakatapuli.

Polo aposele jiamo dokonya leamo doko

¹¹Kaimia^k paluma, nambame lelyo dake nyakamame masalapape: Wai Pii Epe nambame langio doko endakalinya pii mende daa. ¹²Pii^l doko namba endakali mendeme langiamopa sala nayo. Endakali mendeme

^a 1:1 Lo 1:1; Ga 1:11-12 ^b 1:2 Lo 1:4 ^c 1:3 Lo 1:7; Pl 1:2 ^d 1:4 Ga 2:20; 1 Ti 2:6; Ta 2:14; 1 Jo 5:19 ^e 1:5 Lo 16:27 ^f 1:6 Mt 9:16-17; 2 Ko 11:4; 2 Te 2:2 ^g 1:7 Ap 15:1,24; Ga 5:10
^h 1:8 Lo 9:3; 1 Ko 16:22 ⁱ 1:9 1 Ko 11:2 ^j 1:10 Lo 1:1; 1 Te 2:4 ^k 1:11 Mt 16:17;
Lo 1:16-17 ^l 1:12 Ga 1:1

namba mana langya nayaka. Jisasa Kataisame Wai Pii Epe doko namba-kisa panasia.

¹³Wamba^m nambame Jutamanya mana makandepi miningi dokonya minao katao nambame Gotenya sosa doko etete watao pyao mee jinya nepalanya pyoo katee lapae doko nyakamame sepeami. ¹⁴Nambaⁿ tata dokonya nambame namba yale yango longo dupa Jutamanya mana makandepi miningi dokonya ita minao minio. Nambanya yumbangenyana mana miniamino dupa nambame etete pupu lao watao minio. ¹⁵⁻¹⁶Dopaka^{o p q} doko, wamba nambanya endangimi namba manja naengesa Goteme namba yapao nyia-pyaa. Maitakao baame mona epe palyoo namba ipu lea. Nambame baanya Ikiningi dokonya lao Wai Pii Epe doko endakali tata waka dupa lamaiyakatale lao Goteme mona epe palyetala baanya Ikiningi doko namba laitaka pia. Dopa piamopa nambame endakali mende-kisa pisala nayo. ¹⁷Dee nambame Jetusaleme yuu ongonya aposele wambao kateamino dupanya napeo. Dopa napinya namba Atepia yuu dokonya pupala dee Damasakosa pilyio.

¹⁸Maitakao^r ee kana tepoma pateamopa nambame akali Pita doko kanjanya Jetusaleme peo. Pupala, baapa koto kingi ita mende-kisa dee yuungi awapa kateamba. ¹⁹Dokopa^s nambame aposele dupanya waka mende nakandeo. Kamongonya kaiminingi Jemesa doko iki kandeo. ²⁰Indupa^t nambame nyakamanya pii pepa pyao peekelyo datupa Gotenya enomba dokonya kiningi lao peekelyona kanjepape! ²¹Dee^u maitakao namba yuu Sitiapa Silisiapa dolaponya peo. ²²Peopa Kataisanya sosa Jutia yuu dokonya wakale wakale kateamino dupame namba enomba nakandeami. ²³Dupame wamba naima minao koyasoo kateamo akali dokome indupa masoo miningi minao koyasiamo dokonyaka lao mana lamaiyoo kalyamona lapae doko iki soo kateami-pyaa. ²⁴Dupame namba Goteme dopa piana lapae doko sepala baa lao lalyoo kateami-pyaa.

Aposele dupame Polo aposele yangona lao kingi nyiamino doko

2 ¹Ee^v kana kingi ita mende-kisa dee kitomende pateamopa Banapasa nalimba Jetusaleme dee peamba. Nambame akali Taitesa lenge doko awapa laminao peo. ²Goteme^w namba pupili lao masiamo doko panasiamopa peo. Pupala Wai Pii Epe lapae nambame endakali tata waka dupa lamaiyoo katenge doko aipa lamaingipi lao Jetusaleme tange masoo miningi endakali dupame sina lao lamaiyo. Dee nambame nyakamanya akali andake joo kateamino dupa elyakao lamaiyo. Kalai

^m 1:13 Ap 8:3, 22:4-5, 26:9-11 ⁿ 1:14 Mk 7:3; Ap 22:3, 26:4-5 ^o 1:15 Ais 49:1; Jet 1:5; Lu 1:15 ^p 1:15-16 Ap 9:3-16, 22:6-10, 26:13-18 ^q 1:16 Mt 16:17; Lo 1:1; Ga 2:7
^r 1:18 Jo 1:42; Ap 9:23-30, 11:30 ^s 1:19 Mt 13:55; Ap 12:17; Ga 2:9 ^t 1:20 Lo 1:9
^u 1:21 Ap 9:30, 11:25-26 ^v 2:1 Ap 11:30, 15:2 ^w 2:2 Ap 4:36; 2 Ko 2:13; Pl 2:16

indupa pilyopi, dee wamba piopi, dupa aopyoo latala angi jala nayatame lao dopa pio. ³Nambapa^x tole peambano akali Taitesa doko Gitiki. Dopaka doko, dokaitame baanya elya pingi kambu kaketenaka naleami. ⁴⁻⁵Kini,^y ^z sambo masoo miningi kaiminingi mendapuaime naima Kataisa Jisasame mokao nyepae kalyamano mana doko aipa pyoo kalyamipi lao kandalanya waa katao ipao naima konda petala dupame Taitesanya elya pingi kambu kaketena leami. Dopa pyoo dupame naima kendemane akali injisalanya piaminopa, naimame dupanya pii leamino dupanya etete kukipi mende ŋee lao nasiama. Wai Pii Epe kiningi lapae doko nyakamaka kisa koteaka lao auu pyoo sekena lao dopa piama. ⁶Akali^a andake joo kateamino dupa akali andake aipalepe lao nambame itakinya nasilyo. Goteme lengelyaapi kandao endakali dupa mokosala naenge. Akali andake dupame namba masingi waka mende waipa soo langya nayami. ⁷Dopa^b napinya Goteme Wai Pii Epe doko Juta endakali dupa Pitame lamaina leamoliaka pyoo nambame endakali tata waka dupa lamaipi lea lamona lao kandeami. ⁸Doko Pita Juta endakali dupanya aposele katena lea Gote dokome namba endakali tata waka dupanya aposele kata leaka. ⁹Akali^c andakena lao kenge singi Jemesapi, Pitapi, Jonepi, akali dutupame kalai doko pipenge pupu lapae doko Goteme namba dia lamona lao masetala mona setao katamana lao Banapasa nalimba kingi nyiami. Kingi nyepala nalimba endakali tata waka dupanya kainanya kalai pimbana nyakama Juta endakali dupanya kainanya kalai pina lao pii wasiama. ¹⁰Dokaitame^d pii mendai iki latala nyilyambome naima tata endakali tipya dupa nisokondape pyoo nisalapape leami. Nambame kalai dokonyaka kyoto joo pyoo kateo.

Andioko yuu dokonya Polome Pita pyalanya leamo doko

¹¹Dopaka^e doko, maitakao Pitame Andioko yuu dokonya ipao mana miniamo dokome baa-kisa koo silyamona lao panasiamosa nambame baa enomba kandao pyalanya leo. ¹²Endakali^f mendatupa Jemesame epena leamo dutupa naepeaminopa, Pitame kaiminingi tata waka dupa-pipa awapa nee nao katea. Akali dutupa ipateaminopa baame akalinya elya pingi kambu kepapimili lao masingi akali dupa paka kayapala, dee dupa-pipa nee awapa nanenya baa waka katea. ¹³Pitame minakasoo koo piamo doko Juta yango dupame awapa piamiaka. Dopa piamino dokonya mana dokome Banapasa apata pyalya lao nyiaka. ¹⁴Dopaka doko, nambame kandeopa dupame Wai Pii Epe kiningi lapae singi dokonya tolao watao minao payala nayaminosa, endakali dupa pitakanya enomba

^x 2:3 Ap 16:3 ^y 2:4 Lo 6:22; Ga 1:7, 5:1,13 ^z 2:5 Ap 15:23-29 ^a 2:6 Dit 10:17; Ap 10:34

^b 2:7 Ap 15:3-4,12, 22:21; Lo 15:17-19; 1 Ti 2:7 ^c 2:9 Ap 1:19, 12:17; Ep 3:8; Pa 3:12

^d 2:10 Ap 11:29-30; 1 Ko 16:1 ^e 2:11 Ap 11:19-26 ^f 2:12 Ap 10:1,28, 11:3, 15:24

dokonya Pita kandao dapa lamaiyo: “Emba Juta pyomo doko embame Jutamanya mana doko naminao endakali tata waka dupanya mana dapa minao kalyeno doko embame aipa petala endakali tata waka dupame Jutamanya mana minao katengeli pyoo katena leepe?” leo.

Masoo miningi dokonya iki Goteme endakali dupa pyoo nyingi

¹⁵Kini^g naima Jutamanya mandipae. Naima koo pingi endakali tata waka dupanya mandipae daa. ¹⁶Dopaka doko endakali mendeme mana setapae dupanya lapae silyamoli pingi dokonya-kaita Goteme baa tolataena nalanya, Jisasa Kataisa lao masoo miningi dokonya Goteme baa tolatae lengena lao masilyamano. Mana setapae dupanya lapae silyamoli pingi dokonya daa, Kataisa lao masoo miningi dokonya Goteme naima tolataena lena lao naimame Kataisa Jisasa lao masoo minateama. Doko aipuma? Mana setapae dupanya lapae silyamoli pingi dokonya-kaita Goteme endakali mendaipi mende tolataena natalana lapae silyamo. ¹⁷Dopaka doko, Goteme naima Kataisa-kisa tolataena lena latala dokopa koo pingi endakali tata waka dopale joo naima katatamano kandao doko, Kataisame koo pyepa lao mapisingina latamape? Ongo etete daa! ¹⁸Nambame wamba anda lakyo nepeo dapa deaka nyoo pito kandao doko, dokome namba koo pingi akali joo kalyeno lao panasete. ¹⁹Dopaka^h doko, namba mana setapae dupanya kumapae joo kalyo. Mana setapae dupameaka namba pyao kumasetea. Dokonya namba Gotenya joo paelyo. Namba Kataisapa awapa ita pokonya yukuotae katao kumio. ²⁰Dokonyaⁱ nambame namba tangenya masingi doko dee watao pyoo nakalyo. Daa, Kataisa namba-kisa koko kalyamo. Gotenya Ikiningi dokome namba nea kayapala baame namba alo pyoo baa tangeme kumia-pyaa. Indupa namba kalyo angepa nambame baa lao masoo minao paelyo. ²¹Goteme^j naima kandao mona epe palenge doko nambame daa nalelyo. Mana setapae dupanya-kaita Goteme endakali dupa tolataena lapyali, Kataisa mee kumiali!

Masoo miningi dokonya-kaitape pande mana setapae dokonya-kaitape?

3 ¹Kanau!^k Nyakama Galasia tange kyakaenge dapa, Jisasa Kataisa ita pokonya yukuotae kateana lapae doko naimame nyakama laitaka peteamano doko apimi nyakama minao lungu petala kyakanya nepapyape? ²Nambame^l mendai dake iki nyakama pisilyo: nyakamame mana setapae dupanya lapae silyamoli pyoo katao Oli Sipitisa Gote doko nyiamipi, pande Wai Pii Epe doko soo masoo minao katao nyiamipi?

^g 2:15-16 Wee 143:2; Ap 10:28, 15:10-11; Lo 3:20-28, 4:5, 11:6; Ga 3:11; Pl 3:9

^h 2:19 Lo 6:11, 7:6 ⁱ 2:20 Jo 13:1; Lo 8:10-11; Ga 1:4; Pl 1:21; Kl 3:3-4 ^j 2:21 Jo 15:13; 2 Ko 5:14; Ga 5:2; Ep 5:2,25 ^k 3:1 1 Ko 2:2 ^l 3:2 Lo 5:5; Ga 4:6

³Nyakama aipa petala dopa pyoo kyekelyamipi? Oli Sipitisa dokome lete katasingi kalai doko tee pyao nyakama-kisa petapumopa dee nyakama tangeme pyoo etasemana lao masilyamipi? ⁴Wamba nyakama-kisa opale longo epeamo dupa nyakama-kisa mee maa yangatae kalyape? Daa, dupa nyakama-kisa mee maa yangatae nakalyamona lao nambame masilyo. ⁵Goteme nyakama Oli Sipitisa doko dyoo, dee baame nyakama-kisa kalai pupu lapae dupa pilyamo doko nyakamame mana setapae dupa watao minapiminoso pilyape, pande Wai Pii Epe doko soo masoo minapimino dokonya pilyape? ⁶Masoo^m minapimino dokonya pilyamo daape! Kini mendai dopaka pyoo, “Apotakame dokome Goteme kiningi lelyamona lao masoo minao kateamo dokonya Goteme baa tolataena lea-pyaana,” lapae silyamo.

⁷Ongonya masoo minatamino endakali dupa Apotakamena ikiningi angina lao nyakamame auu pyoo masalapape! ⁸Masooⁿ miningi dokonya-kaita Goteme endakali tata waka dupa tolataena latona lao wamba waka masia-pyaa. Dokonya baame wambao Wai Pii Epe dake Apotakame lamaiyoo dapa lea-pyaa: “Emba-ketae nambame yuunya endakali tata dupa pitaka auu pisetona,” lea-pyaa. ⁹Doko,^o masoo minilyamino endakali dupa Goteme masoo miningi akali Apotakame auu pisihamoliaka pyoo auu pisilyamo.

¹⁰Mana^p setapae dupa watao minatala auu pyoo katamana lao masilyamino endakali dupa Goteme mana setapae dupanya-kaita watao pyatae kalyamino. Doko aipuma? Pii pepa pyapae singi dokonya dapa lapae silyamo: “Endakali mendeme mana setapae singi buku dokonya pii dupa pitaka watao minawaka payala nayatamo kandao doko, baa watao pyata.” ¹¹Dee^q “Masoo miningi dokonya-kaita Goteme tolataena lelyamo endakali doko lete katatana,” lapae silyamo. Dokonya pii dake panao silyamo: mana setapae watao miningi dokonya-kaita Goteme endakali mendaipi mende tolataena nalenge. ¹²Mana^r setapae dupa masoo miningi dokonya mende daa. Ongonya dapa lao pepa pyapae silyamo: “Endakali mendeme mana setapae dupa watao minatatamo kandao doko, baa dokonya lete katatana,” lao pyapae silyamo. ¹³Mana^s setapae dupanya-kaita naima watao pyatana lapae silyamo dokonya Kataisame naima alo pyoo baa watao pina latala naima kii tamao nyia-pyaa. Ongonya dapa lao pepa pyapae silyamo: “Akali itanya yukuotae katatamo doko watao pyatae katatana,” lapae silyamo.

^m 3:6 Jen 15:16; Lo 4:13; Je 2:23 ⁿ 3:8 Jen 12:3, 18:18; Ap 3:5 ^o 3:9 Lo 4:16

^p 3:10 Dit 27:26; Ap 15:10; Lo 4:15; Ga 5:3; Je 2:10 ^q 3:11 Apa 2:4; Lo 1:17; Ga 2:16; Ip 10:38 ^r 3:12 Lep 18:5; Lo 3:24, 10:5 ^s 3:13 Dit 21:23; Ais 53:5; Ap 5:30; Lo 8:3; 2 Ko 5:21; Ga 4:5

¹⁴Goteme^t Apotakame auu pisetona leamo doko endakali tata waka dupame Kataisa Jisasa-kisa nyina lao, dee Goteme Oli Sipitisa ditona leamo doko naimame masoo minao nyalapale lao Kataisame naima kii tamao nyia-pyaa.

Mana setapae dupapi epe maituna leamo dokopa

¹⁵Kaimia paluma, indupa endakali dupame pingi mana mende makande pyoo lelyo. Endakali mendeme namba kumapatopa nambanya moya dupa enda wanepi dupame dapa pyoo nyetamina lao pii lanya setapatamo doko, endakali mendeme daa lawapi dee pii waka mende waipa sala nayata. ¹⁶Dopaka^u pyoo Goteme Apotakamepa baanya mandipaenya mandipae paliuu patamo dupanya mandita mendepa dolapo-kisa epe dupa maitona lea-pyaa. Endakali longo kandao, “Apotakamenya mandipaenya mandipae paliuu patamo dupanya manditami dupana,” lao pii pepa pyapae nasilyamo. Mendai mende iki kandao lapae silyamo: “Embanya mandipaenya mandipae paliuu patamo dupanya mandita mendena,” lao lapae silyamo. Akali doko baa Kataisa. ¹⁷Nambame^v pii lelyo dokonya tenge doko dapa: wambao Goteme endakali dupa-kisa pii lanya setapala dopa pitona lateamo doko ee kana 430 pateamopa mana setapae maitakao epeamo dupame angonya nepatala, Goteme epe maitona leamo doko mee injisala naelyamo. ¹⁸Doko,^w mana setapae dupanya-kaita epe dupa nyingipyali kandao doko, Goteme epe maituna leamo dokonya-kaita nanyipumali. Dopaka doko, Goteme epe maituna leamo dokonya baame epe dupa Apotakame maiya-pyaa.

¹⁹Aipuma^x Goteme mana setapae dupa setea-pyaape? Doko Apotakamenya mandipaenya mandipae paliuu patamo dupanya mandita mende-kisa epe maitona leamo doko ipatamo gii dokonya soo tuu latana lao masetala, Goteme mana setapae dupame koo pingi dupa panasina lao konda pyoo setea-pyaa. Goteme enjele dupame Gote endakalipinya kainanya katenge akali mendeme mana setapae dupa minao epena lena lea-pyaa. ²⁰Akali mendai ikimi kalai pitamo ongopa akali mendeme kainanya katao nyoo pyasoo katapenge nanjeta. Gote baa mendai iki.

Kendemane dupapi ikiningi dupapinya Polome leamo doko

²¹Goteme^y epe maitona leamo dupa mana setapae dupanya daa lapae silyape? Ongo etete daa! Naima lete katasepenge mana setapae mende Goteme diali kandao doko, naimame mana setapae dupa watao minatala

^t 3:14 Lo 5:5; Ep 1:3; Ip 6:12 ^u 3:16 Jen 12:7; Mt 1:1, 21:38; Ap 7:5; Lo 8:16

^v 3:17 Jen 15:13; Eke 12:40 ^w 3:18 Lo 4:14, 11:6 ^x 3:19 Ap 7:38,53; Lo 5:20; Ip 2:2

^y 3:21 Wee 14:1-3; Lo 8:24

endakali tolatae joo katapumali. ²²Dopaka^z doko Goteme baanya pii pepa pyapae singi dokonya isa yuu dake pitaka koonya pupu lapae dokonya pundipundi anjetae kalyaminona lenge. Jisasa Kataisa lao masoo mingi dokonya-kaita baame epe maitona leamo doko masoo minatamino endakali dupame nyina lao dopa lenge.

²³Dopaka^a doko, masoo minala naengesa wambao mana setapae dupame naima anjetae joo isiamopa anjetae joaka katao pao Goteme masoo minilyamano doko panasekeamo gii doko kandao nyiama. ²⁴Kini,^b naima Kataisa lao masoo minatamino dokonya-kaita Goteme naima tolataena lena lao mana setapae dupame naimanya setao katenge akali joo naima isiamopa baa epeamo gii doko kandao nyiama. ²⁵Indupa^c masoo minilyamano doko ipateamo dokonya mana setapae dupame naima dee isala naelyamo. ²⁶Kataisa^d Jisasa lao masoo minilyamino dokome nyakama pitaka Gotenya ikiningi joo kalyamino. ²⁷Doko,^e nyakama Kataisapa pakatae kalyanya kaimbu nyiamino endakali dupa pitakame Kataisa baa nyakama-kisa nyoo kateami. ²⁸Juta^f endakalipi wakapi, kendemane endakalipi mee endakalipi, akalipi endapi, dupa pitaka wakale wakale joo nakalyamino. Kataisa Jisasapa pakatae katao mendai iki joo kalyamino. ²⁹Nyakama^g Kataisanya endakali joo kalyamino dokonya Apotakamenya mandipae joaka katao Goteme Apotakame epe maitona leamo doko nyetami.

4 ¹Nambame^h pii dakenya mende lelyo: wane kole mendeme baanya takanganya moya dupa nyalanya malisoo kalyamo gii dokopa oapi dupa pitaka baanyaka doko, baa kendemane dupa kalyamino mendai dopaleaka joo katenge. ²Wane kole doko takangeme moya maitamo gii doko naepelyamopa endakali mendapuame baapi baanya oapi dupa isakamaiyoo katengema. ³Naimaⁱ mendai dopaka pyoo wane kolea yuunya mana dupanya kendemane joo kateama. ⁴⁻⁵Pitamo^{j k l} gii doko ipateamopa Goteme baanya Ikiningi doko epena lea-pyaa. Enda mendeme baa mandipeamopa baame endakali mana setapae dupanya pundipundi anjetae katenge dupa mokao kii tamao nyalanya mana setapae dupanya pundipundi katapala tolao watao minia. Goteme naima baanya ikiningi injisina lao baame dopa pia. ⁶Indupa nyakama Gotenya ikiningi joo kalyamino dokonya Goteme baanya Ikiningi dokonya Oli Sipitisa doko nyakamanya monanda ongonya epekena latapumopa baame “Apane, Apane” lao kee lelyamo. ⁷Dokonya^m emba dee kendemane joo nakatenya

^z 3:22 Lo 3:9-20,23, 11:32 ^a 3:23 Ga 4:3 ^b 3:24 Lo 3:22, 10:4 ^c 3:25 Ga 4:2

^d 3:26 Jo 1:12; Lo 8:14-15,29; Ga 4:5-7 ^e 3:27 Lo 6:3-4, 13:14 ^f 3:28 Jo 17:21-23; Lo 10:12; 1 Ko 12:13; Kl 3:11 ^g 3:29 Lo 4:13; Ip 6:12; Je 2:5 ^h 4:1 Ip 9:6-17

ⁱ 4:3 Ga 3:23; Kl 2:8,20 ^j 4:4 Jo 1:14; Lo 1:3; Ep 1:10 ^k 4:5 Lo 3:24; Ga 3:13

^l 4:5-7 Lo 8:15-17 ^m 4:7 Jo 15:15; Ga 3:29

ikiningi joo kalyeno. Ikingingi joo kalyeno dokonya Goteme baanya epe dupa emba dita.

Polome Galasia kateamino dupa lao masiamo doko

⁸Kiniⁿ wamba nyakamame Gote masala nayamino gii dokopa gote angi daa dupanya kendemane joo kalai piامي. ⁹Indupa^o nyakamame Gote lao masilyamino. Goteme nyakama lao masilyamona latopa auu pyaapomo. Dopaka doko, aipuma nyakamame yuunya maname kapa pao nisala nayapenge dupanya pilyetala watao minalanya pilyamipi? Aipuma nyakamame mana dupanya dee kendemane jipuma laka lao masilyamipi? ¹⁰Koteaka^p lao nyakamame yuu giipi, kanapi, gii andakepi, ee kanapi, dupaka kandao masetae kalyamino. ¹¹Dokonya^q nambame nyakama lao masetala neame kumilyo! Nambame nyakama-kisa kalai lekeleke tao pio dupa aopyoo latala mee jetame lao masilyo.

¹²Oo kaimia paluma! Wamba namba nyakama kateamino dopale jio dokonya indupa nyakama namba kalyoli pyoo katapimi laka lao ee lelyo! Nyakamame namba kandao koo mende napiami. ¹³Namba^r yaina nyio tenge dokonya minao nyakama katiamisa tee pyao ipupala Wai Pii Epe doko nyakama langio doko nyakamame masilyamino. ¹⁴Nambanya^s yaina dokome nyakamanya masingi kenda pisiamoaka doko, nyakamame namba maka kayawapi kandanya palyoapi mende napinya, Gotenya enjele mendepi Kataisa Jisasapi joo namba lanyiami. ¹⁵Wamba nyakama mona etete yaepao kateamino doko aipa petala alu pilyape? Dokonya nambame nyakama kandao pii dake lelyo: wamba nyakamame nyakamanya lenge dolapo lukuoo nyepenge jiali kandao doko, lukuoo namba diamili! ¹⁶Indupa^t nambame nyakama kiningi langilyo dokonya namba nyakamanya yanda pipili jilyope? ¹⁷Endakali dokaitame nyakama andiki pyokondape pyoo kalyaminoaka doko, kalai pyaanya pilyamino doko angi kalai epe mende pyaanya napilyamino. Nyakamame dupanya pii doko watao minatala nambame pii nyakama langio doko yakinalapale lao pilyamino. ¹⁸Akali mendeme kalai epe mende pyaanya endakali dupa andiki pyokondape pyoo katatamo kandao doko epe. Pii dake namba nyakama-pipa awapa katelyamano dokopa iki angi joo sala naenge. Koteaka lao angi joo singi. ¹⁹Oo^u nambanya wane paluma! Enda mende wane manjanya maita pilyamopa tanda nyingili pyoo nambame nyakama lao masetala deaka tanda nyoo kalyo doko, nyoaka katao nyakamame Kataisa iki lao masokondape pitamino gii doko kandao nyoto! ²⁰Nambame nyakama lao masipusa nambanya mona

ⁿ 4:8 1 Ko 8:4-6, 12:2; 1 Te 1:9 ^o 4:9 1 Ko 13:12 ^p 4:10 Lo 14:5; Kl 2:16,20

^q 4:11 Pl 2:16 ^r 4:13 Ap 16:6; 1 Ko 2:3 ^s 4:14 Mt 10:40 ^t 4:16 Emo 5:10

^u 4:19 1 Ko 4:14-15; 2 Ko 6:13; 1 Te 2:7-8; Pm 10

andelyamona, nambame pii lalo doko dee aloo pitoo, namba indupa nyakama-pipa katapuma laka.

Enda Eka Setapanya kongali pii doko

²¹Mana setapae dupa watao minao katapala auu pyoo katatamana lao masilyamino endakali dupa nambame pii mende pisilyo: Gotenya pii pepa pyapae dupanya lapae silyamo dupa nyakama nasilyamipi? ²²Doko^v dapa lao pyapae silyamo: Apotakamenya wane lapo. Dolaponya mende doko kendemane enda dokome mandea-pyaa. Mende doko mee enda dokome mandea-pyaa. ²³Kendemane^w enda dokome wane mandeamo doko endakalimi mandengeli pyoo mandea-pyaa. Mee enda dokome wane mandeamo doko wamba Goteme epe maitona leamo dokonya mandea-pyaa. ²⁴Pii^x doko kongali pii mende. Goteme endakali dupa-kisa pii lapoma lao seteamo dolapo enda dolapo-pipa makande petae silyamo. Pii Goteme Sainaimanda dokonya endakali dupa-kisa lao seteamo dokome kendemane wane mandenge. Pii lao seteamo doko enda Eka. ²⁵Enda^y Eka doko Atepia yuu dokonya Sainaimanda silyamo doko makande pyoo lapae silyamo. Indupa Jetusaleme silyamo dokopi dokonya wane dupapi mana setapae dokonya kendemane joo kalyamino doko baame makande pyoo lapae silyamoaka. ²⁶Dopaka^z doko, ketae silyamo Jetusaleme doko kendemane kalai napingi. Doko naimanya endangi. ²⁷Dokonya^a pii dapa lao pepa pyapae silyamo:

“Enda wane namandenge ingi pyakilyetae
emba mona yaepape!

Enda wane namadyuu tanda nanyingi
emba mona epe palyoo pii puu lao lape!

Doko, enda watao pyatae dokonya wane dupame
enda akali katenge dokonya
wane dupa ita minao longo jilyamo!”

²⁸Kaimia^b paluma, Goteme epe maitona leamo dokonya Aisake mandeamo mendai dopaka pyoo nyakama Gotenya mandipae kalyamino. ²⁹Kiniaka^c doko, endakalimi mandengeli pyoo mandipae wane dokome wamba Oli Sipitissime leamoli pyoo mandipae wane doko watao piamo mana doko indupa mee silyamo. ³⁰Dopaka^d doko, Gotenya pii pepa pyapae singi dokonya aipa lapae silyape? Doko dapa lapae silyamo: “Embame kendemane enda dokopa baanya ikiningi dokopa watao pyape! Doko, kendemane enda dokonya ikiningi dokome mee enda dokonya ikiningi doko-pipa awapa kapa pao moya doko etete nanyeta! ³¹Dopana,^e

^v 4:22 Jen 16:15, 21:2,9 ^w 4:23 Jen 17:16; Lo 9:7-9 ^x 4:24 Lo 8:15; Ga 5:1

^y 4:25 Jo 8:32-33 ^z 4:26 Wee 87:5; Ip 12:22; Pa 3:12, 21:2,10 ^a 4:27 Ais 54:1

^b 4:28 Lo 9:7; Ga 3:29 ^c 4:29 Jen 21:9; 1 Te 2:14 ^d 4:30 Jen 21:10; Jo 8:35

^e 4:31 Ga 3:29

kaimia paluma, naima kendemane enda dokonya ikiningi joo nakatenya, mee enda dokonya ikiningi joo kalyamano.

5 ¹Naima^f mokao nyepae joo kalyepale lao Kataisame naima mokao nya! Tenge ongonya minao nyakama kyoto joo katao endakali mendapuame nyakama dee kendemane injisoo anjina lao kayala nayalapape!

Kitisene endakali dupa mokao nyepae joo katenge doko

²Kandeleno!⁸ Namba Polome pii dake nyakama langilyo: endakali mendapuame akali nyakamanya elya pingi kambu kaketekena lao kayami kandeno doko, Kataisame nyakama kukipi mende nisala nayata! ³Akali elya pingi kambu kaketekena kaelyamino dupa pitaka kandao nambame pii dake dee lao panyo: dopa pitamo akali dokome mana setapae dupanya pii dupa pitaka watao minina! ⁴Akali^h nyakama mana setapae dupanya-kaita Goteme tolataena lapy laka lao masilyamino dupame Kataisa yakinatelyamino! Goteme nyakama mona epe palelyamopa katenge doko kayapala lombapae sepelyamino! ⁵Dopakaⁱ doko, Oli Sipitisa dokome naima sakatasipumopa naimame masoo minao Goteme naima tolataena latamo doko putiti kayao malisoo kalyamano. ⁶Kataisa^j Jisasapa pakatae katao akali elya pingi kambu kepengepi kepala naengepi doko angi mende daa. Baa lao masoo minao katao auu kayao kalai pitamano doko iki angi.

⁷Wamba^k nyakama auu pyoo payamino doko indupa apimi nyakamanya kaita lyokamosa nyakamame kiningi pii doko watao minala naelyamipi? ⁸Mana^l doko nyakama ipupa lelyamo Gote dokome dopa pyepa nalelyamo! ⁹Betesa^m andasingi iisa dokonya betesa wasalanya kuki nyoo katataesa, betesa doko pitakanya tayao andasingi doko nyakamame masalapape. ¹⁰Naimaⁿ Kamongo doko-kisa mendai joo kalyamano tenge dokonya minao nyakamame pii waka mendenya-kaita watao minala nayatamina lao nambame masokondape pyoo masilyo. Akali apimi nyakama minao kyakasilyape lao nambame masala naelyoaka doko, baame baanya kopeta pilyamo dokonya yanu doko baa tange-kisa seta. ¹¹Kaimia^o paluma, akalinya elya pingi kambu kaketena lawaka nambame endakali dupa mana lamaipuli kandao doko, aipuma dupame namba watao pyalanya lapimilipi? Kini, nambame dopa pina lao lamaipuli kandao doko, endakali dupame Kataisa ita pokonya kumiamo dokonya pii

^f 5:1 Mt 11:29; Jo 8:32,36; Ap 15:10; Ga 2:4 ⁸ 5:2 Ga 2:1 ^h 5:4 Ga 3:10;
 Je 2:10 ⁱ 5:5 Lo 8:23,25 ^j 5:6 1 Ko 7:19, 13:13; Ga 6:15; Je 2:4 ^k 5:7 1 Ko 9:24;
 Pl 2:16 ^l 5:8 Ga 1:6 ^m 5:9 1 Ko 5:6 ⁿ 5:10 1 Ko 3:17; 2 Ko 11:15; Ga 1:17; Pl 2:1-5
^o 5:11 1 Ko 1:23

doko tanga nalapimili. ¹²Nyakama^p minao kyakasilyamino akali dupame nyakama tangenya elya pingi lakapo doko etete nyipimi laka lao masilyo!

¹³Oo^q kaimia paluma! Goteme nyakama mokao nyepae joo kalyepale lao wii latea! Dopaka doko, nyakamame mokao nyepae joo katao nyakamanya moname koo pyuani kayatamino dupa pyaa naenya, kendemane endakali joo katao auu kayao mende nisa nisa pyoo kalyepape! ¹⁴Mana^r setapae dupanya pii dupa pitakame pii mendai dakenyaka iki tenge paliuu lapae silyamo: “Embame emba tange auu kaengeli pyoo endakali yango doko auu kayao katape!” ¹⁵Kini dopaka pyoo, nyakamame mena yanapi joo mende nengeme nalya nana pyoo nao katatamino kandao doko, angi mende pyao naa naa pitamina kandao kalyepape!

Oli Sipitisanya dii mandenge dokopa monanya koo dokopa

¹⁶Nambame^s dapa lao lelyo: nyakamame Oli Sipitisa dokome latamoli pyoo payao kalyepape. Dopa pitamino dokome moname koo pipu laka lao masingi dokonya etete watao napitami. ¹⁷Moname^t pipuli lao masingi dokome Oli Sipitisame pipimili lao masingi doko tanga lenge. Oli Sipitisame pipimili lao masingi dokome moname pipuli lao masingi doko tanga lengeaka. Dopa pyoo dolapo yanda pilyabinopa nyakamame pimana lao masilyamino doko kapa pao napingi. ¹⁸Nyakama^u Oli Sipitisa dokome latamoli pyoo payao katatamino kandao doko, mana setapae dupame nyakama isala nayata. ¹⁹⁻²¹Mona^v w koo dokome pingi dupa panao silyamo. Dupanya mendatupa datupa: endakalipi nyele-nye le paenge dokopi, elya pingi napipenge pingi dokopi, luyawaka paenge dokopi, sambo gote dupa lao tama pingi dokopi, timango minao paengepi, nemangopi tomakaepi minao paenge dokopi, imbu kayamaingi dupapi, laiya lenge dokopi, tilya nyingi dokopi, yapa imbu kaenge dupapi, naima tange andake jipuma laka lao masingi dupapi, wakale masa masa pingi dokopi, saa laloo pingi dupapi, tata mendeme tata mendenya opale mende nyipuma laka lao masetala mona koo palengema dupapi, bia akipi nao ae lalya lana pingi dupapi, dee kalai dopale dupa yongenya pingi. Nambame wamba nyakama kandao isoo kalyepape langioli pyoo indupa deaka langilyo: akali mana dopale minilyamino dupa pitaka Goteme isingi panda dokonya nakatatami.

²²⁻²³Dopaka^x doko, Oli Sipitisa dokome dii dapa pyoo mandenge: auu kaenge dokopi, mona etete yaepenge dokopi, mona lyuu lenge dokopi,

^p 5:12 Pl 3:2 ^q 5:13 Lo 6:15; 1 Pi 2:16; Ju 4 ^r 5:14 Lep 19:18; Mt 5:43; Lo 13:8-10

^s 5:16 Lo 8:5-6; Ga 5:25 ^t 5:17 Lo 7:15-23; Je 4:1; 1 Pi 2:11 ^u 5:18 Lo 6:14, 8:14

^v 5:19 Mt 7:17; 1 Ko 6:9-10; Je 1:21 ^w 5:19-21 Lo 1:29-32; Ep 5:3-5 ^x 5:22 1 Ko 13:4-7;

2 Ko 6:6; Ep 5:8-9; 1 Ti 4:12

dupa mandenge. Dee yapa maka nakaenge dokopi, kondo kaenge dokopi, epe injingi dokopi, lelyamoli pingi dokopi, andiki pyoo katenge dokopi, tangeme tange auu pyoo isoo katenge dokopi dutupa baame naima-kisa sakatasingi. Mana dopale dupa mana setapae dupanya mendeme nee nanyingi. ²⁴Kataisa^y Jisasanya endakali dupame nyakamanya mona koo dokopi, moname nyipu laka lao masingi dokopi, koo dupa pipu laka lao masingi dokopi dupa ita pokonya kumaseteami. ²⁵Oli^z Sipitissime naima lete katasilyamo dokonya naima baame latamoli pyoo payamana! ²⁶Naima^a luyiala nayao mende imbu kayasa kayasa napyoo mende tilya nyaa nyaa napimana.

Kenda pipae silyamo dupanya nisaloo pyoo katenge doko

6 ¹Kaimia^b paluma, koo mendeme nyakamanya mende minao makande pitamopa koo doko pia kandeno doko, nyakama Oli Sipitisa paleta endakali dupame andiki pyoo baa dee tolasalapape. Dopa pitaminopa makande pingi mendeme nyakama apata makande pitame lao kandao tange isoo kalyepape. ²Nyakama-kisa^c kenda pipae setamo dupanya nisaloo pyoo kalyepape. Dopa pitamino dokome Kataisanya mana doko watao minatami. ³Akali^d kenge nasingsi mendeme namba kenge singi akali mendena lao masilyamo dokome baa tange minakasilyamo. ⁴Akali^e mendai lao dokome emba tangenya kalai dupa kandokondape pyoo kandao katape. Dopa pitino akali dokome akali mendenya kalai dupa kandatala emba epina lao masala naenya, emba tangenya kalai dupa kandatala emba epina lao masete. ⁵Doko^f aipuma? Akali mendai mendai lao dokome baa tangenya kenda pipae doko soo katata.

⁶Wai^g Pii Epe dokonya mana nyoo kalyamo akali dokome baanya auu pingi setamo dupa pitakanya yangi mokosoo mana lamaingi akali doko maina.

⁷Embame^h emba tange minakasala nayape. Endakali mendeme Gote kandao kilya nakandenge. Akali mendeme eenya nee wai pokatamo mendai dokaitaka andatamopa mandita. ⁸Baameⁱ baanya mona koome auu kaenge ee dokonya wai pokatamo kandao doko, mona koo dokome etete koyasingi nee doko mandyuu maita. Oli Sipitisanya auu kaenge ee dokonya wai pokatamo kandao doko, Oli Sipitisa dokome lete etete katenge nee doko mandyuu baa maita. ⁹Naimame^j kalai epe dupa

^y 5:24 Lo 6:6; Kl 3:5; 1 Ti 1:9-10 ^z 5:25 Lo 8:14 ^a 5:26 Pl 2:3 ^b 6:1 Mt 18:15; 1 Ko 10:12; 2 Te 3:14-15; 2 Ti 2:25; Je 5:19-20 ^c 6:2 Jo 13:34; Lo 8:2, 15:1 ^d 6:3 1 Ko 4:7
^e 6:4 1 Ko 11:28 ^f 6:5 Lo 14:12 ^g 6:6 Lo 15:27; 1 Ko 9:11,14 ^h 6:7 Dit 30:15-20;
 Jop 13:9; Osi 8:7 ⁱ 6:8 Jop 15:35; Pot 11:18; Jo 3:6, 6:63; Lo 6:21-22, 8:13; 1 Ko 15:35-49
^j 6:9 2 Te 3:13

pyaanya maka nakayamana. Naimame kainasa maka nakayatamano kandao doko, mandipenge gii doko ipatamopa nee epe dupa manditama. ¹⁰Dokonya^k naimame pipenge jetamoli pyoo endakali yango dupa pitaka kandao mana epe minamana. Jisasa lao masoo miningi palu doko etete nisokondape pyoo nisemana.

Polome kandao kalyepapena deaka latala pii epe leamo doko

¹¹Nambame^l nyakamanya pepa andake pyoo pyekelyo dake kanjepape. Doko namba tangenya kingimi pyekelyo. ¹²Akali^m nyakamanya elya pingi kambu kepalapa lao kyoto joo lelyamino akali dupa endakalimi epe lamo lao kandapimili lao lelyamino. Dopa lelyamino doko Kataisa ita pokonya kumiamo dokonya pii doko lao masoo minatala tanda nanyemana lao lelyamino. ¹³Elyaⁿ pingi kambu kepalapa lelyamino akali dupa tangeme mana setapae dupa watao minala naelyamino. Nyakamame dupanya pii doko watao minao elya pingi kambu kepatamino dokonya alyasale joo katamana lao masetala dupame akali nyakama elya pingi kambu kepapimi laka lao masilyamino. ¹⁴Dopaka^o doko, namba waka mendenya alyasale joo katato doko kapa etete napatana, naimanya Kamongo Jisasa Kataisa ita pokonya kumiamo dokonya iki alyasale joo katatoo lao masilyo. Kataisa ita poko dokonya kumiamo dokome isa yuu koo singi dake nambanya lengelyaapi dokonya pyao kumasetea. Namba isa yuu koo singi dakenya lengelyaapi dokonya pyao kumaseteaka. ¹⁵Elya^p pingi kambu kepengepi kepala naengepi doko angi mende daa. Goteme endakali enenge injisingi doko iki angi. ¹⁶Makande^q doko watatamino endakali dupa pitaka kandao Goteme kondo kayapala dupanya mona lyuu lasakamaina! Endakali dupa Gotenya Isataele tata.

¹⁷Nambame^r Jisasanya kalai doko pyoo tanda neo dokonya namba-kisa kombe palelyamo. Dokonya tenda endakali mendeme kenda pipae mendapua namba-kisa setala nayapenge.

¹⁸Kaimia paluma, naimanya Kamongo Jisasa Kataisanya mona epe palenge doko nyakamanya mona dokonya palyekena. Kiniaka.

^k 6:10 1 Te 5:15 ^l 6:11 1 Ko 16:21; Kl 4:18 ^m 6:12 Ga 5:11; Pl 3:18; Kl 2:18

ⁿ 6:13 Lo 2:21-22 ^o 6:14 1 Ko 1:31, 2:2 ^p 6:15 1 Ko 7:19; 2 Ko 5:17; Ga 5:6

^q 6:16 Wee 125:5 ^r 6:17 2 Ko 4:10